

官常典第五百四十六卷

將帥部紀事二

齊東野語岳鵬舉征羣盜過廬陵託宿廛市質明爲主人汛掃門宇洗滌盆盎而去郡守供帳餞別於郊師行將絕謁未得通問大將軍何在殿者曰已雜偏裨去矣其嚴肅如此真可謂中興諸將第一周洪道爲追復制詞有云事上以忠至不嫌於辰告行師有律幾不犯於秋毫蓋實錄也辰告者謂岳嘗上疏請建儲云

行營雜錄紹興中金人遣其祕書監劉陶來聘因問岳飛以何罪而死館伴者無以對但曰意欲謀叛爲部將所害告以抵誅陶曰江南忠臣善用兵者止有岳飛所至紀律甚嚴秋毫無犯所謂項羽有一范增而不能用所以爲我擒如飛者其亦江南之范增乎館伴者默不能對秦檜聞之約束勿奏俄以不職貶其人

楓窗小牘岳少保旣死獄中籍其家僅金玉犀帶數條及瑣鎧堽鏐南蠻銅弩鎗刀弓劍鞍轡等物布絹三千餘匹粟麥五千餘石錢十餘萬書籍數千卷而已

癸辛雜識洪起畏知京口日乃北軍入境之初嘗大書揭榜四境曰家在臨安職守京口北騎若來有死不走後舉郡以降人改其末句云不降則走

談苑郭達伐交州行師無紀律其所措置殆可笑也進兵有日乃付諸將文字各一大軸謂之將軍下令字畫甚細節目甚繁又戒諸將不得漏洩諸將近燈火竊觀之徐禧嘗見之云如一部尙書多禱三日夜讀之方竟則諸將倉卒之際何暇一一也內一事云一交人好乘象象畏猪聲仰諸軍多養猪如象來則以錐刺猪猪既作聲象自退走

貴耳集王丞相欲進擬辛幼安除一帥周益公堅不肯王丞相問益公云幼安帥材何不用之益公答云不然凡幼安所殺人命在吾輩執筆者當之王遂不復言

齊東野語時曲端與吳玠皆有重名陝西人爲之語曰有文有武是曲大有謀有勇是吳大婁室寇邠州日端屢戰皆捷至白店原撒離喝乘高望之懼而號泣金人目之爲啼哭郎君其爲敵所畏如此端爲涇原都統日有叔爲偏將戰敗誅之既乃發喪祭之以文曰嗚呼斬副將者涇原統制也祭叔者姪曲端也尙享一軍畏服

端紀律極嚴魏公嘗按視端軍執撾以軍禮見閫無一人

公異之謂欲點視端以所部五軍籍進公點其一部於廷間開籠縱一鵠以往而所點之軍隨至張爲愕然旣而欲盡觀於是悉縱五鵠則五軍頃刻而集戈甲煥燦旗幟精明魏公雖獎而心實忌之在蜀日嘗有詩云破碎江山不足論何時重到滑南村一聲長嘯東風裏多少人歸未斷魂亦可見其志也

金谿縣志鄧雱字子釋生而沉毅膂力絕倫好孫吳兵法邑有亡命報仇者嘯聚四境有司不能治雱次第殲其首散其黨有司以聞建炎初檄爲都統得兵數千分部訓練日以精銳邑南清江傳坊有傅安潛者亦聚子弟里人數百以應雱二族相爲犄角以禦寇時號鄧傅兩忠義云建炎二年少保楊次山軍叛寇郡城郡守檄雱解圍雱與賊血戰於撫城之南賊黨奔潰後次山餘黨桂中立集衆寇饒州雱被檄提兵解饒州圍擒中立斬之叛將苗傅率衆圍建昌城幾不守雱振衆南趨賊宵遁十一月寇犯郡城雱夜進兵殲其首乘勝追殺韓青等郡城以全四年賊首楊惟忠率衆圍郡城繡使被旨募兵無有應者雱秣勵士馬進戰俘惟忠斬之并斬其將龐而還魔賊王九二等以妖術率衆萬計掠上青園貴溪甚急雱命安潛設伏於龍虎山之側鋒交伏發賊衆大潰溺死者不可勝

數處寇李端仁圍宜黃雋擒之紹興元年殺劇盜潘達等二年賈大等亂於崇仁之堯山雋率衆往擊生擒賈大及其徒衆安仁賊吳十八聚衆謀不軌雋往戰擒之殲其黨合境帖息三年楊世雄攻臨川官軍閉城固守外援莫至雋被檄進兵初兵憚賊遲渡雋厲聲叱曰吾料之熟矣乃爭渡衝賊陣賊悉奔逸乘勝追擊大破之世雄斃流矢餘黨悉平四年建昌劉靖嚴才等閉城叛憲檄雋及安潛往討之雋不忍肝民橫羅鋒鏑但命其子礪持樞密院旗榜往招撫之賊素讐雋威名又見礪至誠卽釋甲羅拜礪遂受靖與嚴才等降斬其兇李武等七人一軍安堵是年虔寇齊述等亂吉安監司檄雋赴吉安戍守談笑間繫其魁帥吉民賴之以寧紹興五年以疾終

傳安潛字顯夫建炎

間與鄧雋同結寨於韓婆鄧以椎牛誇示拳勇潛以五指撚竹爲薪不藉斧析至今相傳韓婆產竹脆而可揉其遺跡也潛勇鬪立功槩同鄧族年八十有二奉召入京猶躍馬揮戈稱爲躑躅

寧國縣志仙立字紹初宋宣州僉判柏齡之子故居河南湯陰建炎初扈駕南渡以功授殿前都虞候尋轉武毅郎屢立戰功平楊幺破戚方上將以寶玩繒幣賚之辭曰臣世受國恩常懼無以補報今以犬馬微勞復有所賚予非臣所敢當也先是岳武穆拜表使柏齡起居二帝二帝嘉之賜姓仙

氏及是語聞上上益稱賞曰爾父忠勤朕心識之爾今勞謙如此其以賜姓授以璽勅俾爾子子孫孫有所憑執立頓首祇謝仕至右武大夫惠州刺史食邑七百戶殿前司統卒於杭

長沙府志劉玠潭州將官建炎中金人侵潭州玠挺身血戰中數十矢死於陣民立廟祀之

齊東野語杜充之駐建康也岳飛軍立硬寨於宜興命親將守之飛兵出不利夫人密諭親將選精銳具餼糧潛爲策應之備未幾飛兵還日入教場呼問之曰汝欲何爲曰聞太尉軍小不利故擇敢戰之士以備策應此男女孝順耳飛曰吾命汝堅守根本天不能移地不能動汝今不待吾令擅自搖動是無師律也立命責短狀將大懼祈哀吐實謂此非某所自爲蓋夫人亦曾有命耳飛愈怒竟斬之 崔福故羣盜也嘗爲官軍所捕會夜大雪方與嬰兒同榻兒寒夜啼不得睡覺捕者至因

以故衣擁兒口兒得衣煖啼止遂得逸去因隸籍軍伍累從陳子華捕賊積功至刺史大將軍後從陳往江西留南昌旣而子華易閩金陵兼節制淮西而崔仍留洪時倅攝郡一日倅與郡僚宴滕王閣崔怒其不見招憾之適至府治前民有立牌訴冤者崔乃攜其人直至飲所責以郡官不理民事嗾諸卒盡碎飲器官吏皆奔逸竄去莫敢與撓其鋒子華知之遂檄還建康會淮西有警命王鑑出

師鑑請福爲援福不樂爲鑑用託以葬女擅歸鑑怒遂白其前後過惡且必正其謾令之罪會子華亦厭忌之於是遂從軍法然後聲其罪於朝福勇悍善戰有聲其死也軍中惜之 王佐宣子帥長沙日茶賊陳豐嘯聚數千人出沒旁郡朝廷命宣子討之時馮太尉湛謫居在焉宣子乃權宜用之諜知賊巢所在乘日晡放飯少休時遣亡命卒三十人持短兵以前湛自率百人繼其後徑入山寨豐方抱孫獨坐其徒皆無在者卒覩官軍錯愕不知所爲亟鳴金嘯集已無及矣於是成擒餘黨亦多就捕宣子乃以湛功聞於朝於是湛以勞復原官宣子增秩辛幼安以詞賀之有云三萬卷龍頭客渾未得文章力把詩書馬上笑驅鋒鏑金印明年如斗大貂蟬元自拋鏐出宣子得之疑爲諷己意頗銜之殊不知陳後山亦嘗用此語送蘇尙書知定州云枉讀平生三萬卷貂蟬當復作拋鏐幼安正用此然宣子尹京之時嘗有書與執政云佐本書生歷官處自有本末未嘗得罪於清議今乃蒙置諸士大夫所不可爲之地而與數君子接踵而進除目一傳天下士人視佐爲何等類終身之累孰大於此是亦宣子之本心耳

輟耕錄張氏據有平江日其部將左丞呂珍守紹興參軍陳庶子饒介之在張左右一日陳賦詩饒

染翰題一紈扇以寄呂云後來江左英賢傳又是淮西保相家間說錦袍酣戰罷不驚越女采荷花
饒素負書名且詩語俊麗爲作者所稱呂俾人讀罷忽大怒曰吾爲主人守邊疆萬死鋒鏑間豈務
愛女子而不驚之耶見則必殺之又元帥李其姓者杭州庚子之圍解頗著功勞一士人授之以詩
將有求焉其詩有黃金合鑄李將軍之句李大怒曰吾勞苦數年止是將軍今年纔得元帥乃復令
我爲將軍耶命帳下策出之二事雖相傳以爲笑亦可因以爲戒

宋史張行信傳行信僉河東路按察司事上言自興兵以來將帥甚難其人願陛下令重臣各舉所
知才果可用卽賜召見褒顯獎諭令其自效必有奮命報國昔李牧爲趙將軍功爵賞皆得自專出
攻入守不從中覆遂能北破大敵而抑強秦今命將若不以文法拘繩中旨牽制委任責成使得盡
其智能則克復之功可望矣上善其言時方擢任王守信賈耐兒者爲將皆鄙俗不材不曉兵律行
信懼其誤國上疏曰易稱開國承家小人勿用聖人所以垂戒後世者其嚴如此今大兵縱橫人情
洵懼應敵興理非賢智莫能狂子庸流猥蒙拔擢參預機務甚無謂也於是上皆罷之

齊東野語趙忠肅公方開闢荆襄日久軍民知其威聲端平甲午冬朝廷以其子范武仲爲荆湖制

置大使鎮襄陽蓋欲其紹世勳作藩屏也至郡則倚王旻樊文彬李伯淵黃國弼數人爲腹心朝夕酣狎了無上下之序民訟邊瑣一切廢弛且諸將不能協濟反自相忌嫉而一時幕府亦袖手坐觀成敗而已乙未五月唐州守楊侁稟議因言本州統制軍馬郭勝有異志蓋楊郭有隙非一日矣楊之來郭已疑之及楊受犒歸趙乃以檄召郭勝於是郭之反謀始決六月二日趙下令以襄陽簿廳置勘院將以勘郭勝也先是趙幕客蔣應符往司唐州遂泄其謀於郭初六日乘楊侁朝拜天貺節遂閉城率衆射死侁於涼轎中凡回易錢之在州者千餘萬皆掠取之且下令曰百姓及忠義軍大軍之屯戍在城者皆不殺卽密遣人求北援初七日反報至襄陽時制閫諸客方命妓宴趙楷於城西檀溪趙忽急召兩制議機事時趙括夫瑞州人以制幹權章清孫以襄倅權始知唐州之事已泄初八日命忠衛都統江海領兵初九日先鋒行兵號二萬又命隨州守臣金子才節制諸項捕賊軍馬攝棗陽軍劉子澄策應趙楷監軍三人者皆以西師之敗鐫責趙欲於此立功以爲復官之地七月二日北軍至唐州棗林全劉聞之遁去先又調德安守王旻策援亦不至反俱以捷聞全王至襄凡痛飲半月而回旣而探報益急寇已半渡黃河而王旻歸德安以黃州克敵軍叛德安境遣人招

納四千八百餘人意欲沮撓淮西制帥楊恢趙欣然從之九月十日聞王旻帶所納叛軍來襄人疑其反覆不常而末如之何趙忽令諸門不許出一人一擔而所置緝捕司帶行人孫山等察探變是爲非於是襄人愈側足矣二十三日襄陽告急趙復不遣援兵自此京西諸郡俱叛十一月一日北軍首領倂盡至襄陽江北對壘不戰而敗遣李師古持書與趙趙不敢封焚之十一日北哨入南關卽追逐斬守關趙寧以徇十九日北騎至襄陽城下約六七千人下寨於檀溪山二十日戰於上關口余哲軍敗喪數千人再戰勝之二十一日北軍始退十二月北軍自陝州回戰於江北樊城我師少勝則以大捷聞自十月初下令清野凡襄四境民居竹木無子遺至是物價踴貴諸將日飲亡何用散樂段得仙者佐歡繞城躍馬殊不介意二月五日始遣王旻帶克敵軍往均州光化軍巡邏逗遛不進僅至小樊乃以收復兩郡捷聞是日朝廷遣鎮江都統李虎號無敵軍偕光州都統王福所部軍至襄策應而克敵軍不能自安矣趙遂急遣王旻避之趙至城迂虎虎傳朝廷宣諭之命趙涕泣謝恩乃對虎慷慨共酌十餘大觥以歸無敵軍卽宣言欲勦除克敵云不因你瞞番人在此如何我瞞四千里路來十四日王旻回趙令戍郢州旻恃平日嫖狎不從必欲入城十六日下令大宴犒

諸制領於是克敵愈疑公出怨言襄人愈皇皇矣有以其言密告趙內機檢者宴遂中止二十日止宴李虎王旻王福楊茂先李伯淵黃光弼夏全於府大醉極歡達旦而罷二十一日克敵軍往南門燒紙蓋合謀也夜二鼓縱火於市東竹竿巷口及於諸處縱火發喊搶入制府轅門爲門內軍射殺二人復至東市劫掠擐甲露刃不許救撲至二十三日火方熄趙帥於南門城上呼王旻詰問李虎適在旁云好斬言未脫口而旻首已斷身皆分裂矣趙遂下令凡背心有紅月號者皆斬克敵軍號也於是刀刃亂下死者多無辜然叛軍未盡勦也未時火復自南門起凡官民之居一燬而空漕使李伯度教官羅叔度兩家避難東城上亦爲叛軍焚殺二十三日遣李伯淵往江北勦殺叛軍未回克敵軍遂殺其家因乘亂劫掠居民尤酷趙帥於是先焚其父威惠廟遂同李虎王國弼夏全及回回四人潛出西門失去制司印城中久之方覺遂皆狼狽奔逃而出矣是日江北中衛軍亦反趙至荊州復遣都統江海戍金門有軍校獲制司印來獻趙補以統領之職是時叛亂相仍趙乃嚴刑以安反側於教塲後掘地方三丈深二丈以石作窰爲地牢上覆以土不施柵械懸梯而下以準遣湖翀主之大抵襄州之禍萌於趙武仲之來成於王旻招納克敵軍激於李虎無敵軍之至自岳武穆

收復凡一百三十年生聚繁庶不減昔日城池高深甲於西陲一旦灰燼禍至慘也先是郡廳相對有雅歌樓雄麗特甚一日趙方坐衙忽覩樓中妓女人物雜遝宴飲趙怒以爲僚屬置宴略不避忌亟遣人覘之則樓門扃鎖甚嚴凝塵滿室識者已疑其不祥章叔恭時爲倅一夕坐中堂閱案牘至夜分忽若有人自後呼之曰快去快去此地不久也心疑之而未深信越月而亂作益知禍亂有定數鬼神固已先知矣此事皆章叔恭得之目擊云

金谿縣志黃元龍字子英璜溪人端平間閩寇陳三鎗等跳梁吉贛太師陳公華爲江閩三路招討使入境訪求將才元龍應募遂提兵抵吉贛連破屏風松子等寨擒三鎗斬之餘黨悉平太師薦元龍於朝上以金谿義兵皆自養至是命官給主將俸月三十千參謀部將月二十千每丁日米二升半授元龍承信郎

合肥縣志劉虎字伯林廬州梁縣人起農家隸軍籍四明趙善湘來帥淮西一見偉之留帳下嘉定十五年金人犯安豐請爲援師先鋒連戰賈鷄山陳村漕口斬首六百級獲二統軍及千戶十三人以獻寶慶二年賊紅衲襖擾山陽從戍揚州以偏師敗之於顧澤三年由海道泝淮戰盱楚漣海間

大小捷三十有七於劉伶臺手射貫銀甲者應弦而仆實沒拐曳統軍云特旨補進勇副尉靖安水軍正將紹定四年從吳英復淮安復鹽城有功五年紅賊略平惟金將納合買住據盱眙城跨泗爲橋渡衆柵龜山表裏相援公以淮陰水軍統制提所部進擊乘風便出賊不意夜奪浮橋焚其駕橋之舟百有九十斬萬戶李松掩龜山之塞壘而鏖削之還師攻泗州自三月至於九月捷無虛日擒萬戶劉三兒三十人梟僞酋楊總領龐萬戶於舟次納合買住以城降行賞居第一擢鎮江副都統仍總轄淮陰水陸軍馬時察罕擁兵攻濠州遣阿朮魯由渦潁入淮水陸並進公師於五河率勇士奮前拒戰乘風縱火槍火礮火箭火蒺藜焚之北兵敗績會划車弩發中矢洞腹達背悶絕復甦指授諸將方略意氣彌厲敵不能支乃遁擒阿朮魯等十將三年援壽春自三月至於五月晝耀兵夜斫營戰百餘合焚其壁壘遂解重圍凱奏理宗命賜金帶金縷袍進利州觀察使明年召除帶御器械拜合肥郡侯寶祐元年知泰州繕城浚隍恆若敵至會箭毒發力請而歸卒於金陵第年五十有三兄海從弟師勇師雄師賢皆以善騎射爲名將

元史世祖本紀至元十三年二月帝旣平宋召宋諸將問曰爾等何降之易耶對曰宋有強臣賈似

道擅國柄每優禮文士而獨輕武官臣等久積不平心離體解所以望風而送款也帝命董文忠答之曰借使似道實輕汝曹特似道一人之過耳且汝主何負焉正如所言則似道之輕汝也固宜治城客論景泰元年廣寧伯劉安都督僉事郭登守大同也先遣人奉上皇至城下召守臣出見議事劉邀郭同出郭曰人情叵測安知其不以夏人之誘楊定者誘我乎吾二人之身城之存亡攸繫脫或懷詐吾二人不足惜如此城何環甲登城北面拜曰臣非敢不出但此城臣不敢擅離耳劉竟自出因得迎復上皇命加封侯從而入京給事中葉盛等劾之詔復原職英廟復位進劉爵郭罷廢至成化間始得復用人莫不多郭之守正云

畜德錄威寧伯王公越都御史總制北伐時嘗親視諸軍食飲數賜酒肉動息必悉其情至犯令不少貸每暇命出獵計矢中禽之多寡於敵陣爲先後有將官告姦受金者置之許出死力不問於是將士感泣無不用命者 都御史韓公雍征大藤峽出兵令五鼓戰將領者聞賊已覺恐遲失事二更卽發大破之公賞其功而問以違令之罪以軍法當斬乃具聞請釋曰萬一不用命而敗奈何人謂公得將將之體

見聞錄萬曆壬午四月間廣東蛋賊肆劫於番南東順之間撫之甚易而當事貪功奏勦於時偏將沈茂麻鎮都趙陞等會同海道副使閩朱公東光發兵出海朱以梁文統精勇數十百人駕三四艘自衛期各將於波羅廟及朱船至而諸將皆退遁不果來朱復進約三十里而所稱獅百脚蛋賊以五十艘來薄朱船梁文乘風縱火挺刃而前奮擊大呼賊皆糜潰降賊舟三十餘艘而歸至沙灣諸將皆艤船相待船有俘獲潛問之則皆此灣良家男女也梁文遍語諸將曰殲賊所以安民今擄民爲賊公等踰於賊矣且國法可干獨不畏天道乎諸將不納梁文遂舉所降賊舟與之悉捨所俘男女約千一百有奇於是沙灣之民戶以沉香貌梁祝之梁文盲一目人呼之爲獨眼梁

明外史秦良玉傳良玉忠州人嫁石柱宣撫使馬千乘萬曆二十七年大征播州千乘以三千人從良玉別統精卒五百裹糧自隨與副將周國柱拒賊鄧坎明年正月二日賊乘官軍宴夜襲良玉首擊敗之追入賊境連破金筑等七寨已僭酉陽諸軍直取桑木關大敗賊衆爲南川路戰功第一賊平良玉不言功後千乘爲部民所訟瘐死雲陽獄良玉代領其職良玉爲人饒膽智善騎射兼通詞翰儀度嫺雅而馭下嚴峻每行軍發令戎伍整肅所部號白桿兵泰昌時徵其兵援遼朝命賜良玉

三品服良玉統精卒三千赴之所過秋毫無犯詔加二品服卽予封誥弟邦屏戰沒良玉卽遣使入都製冬衣一千五百分給殘卒而身督精兵三千抵榆關上急公家難下復私門仇氣甚壯奢崇明黨樊龍反重慶齎金帛結援良玉怒斬其使卽發兵西上度渝城奄至重慶南坪關扼賊歸路伏兵襲兩河焚其舟已而良玉兵少挫餉不繼引還奢崇明圍成都急良玉奉巡撫朱燮元檄復出軍諸土司皆逗遛獨良玉鼓行而西收新都長驅抵成都賊遂解圍去良玉乃還軍攻二郎關復重慶良玉初舉兵卽以疏聞命封夫人錫誥命至是復授都督僉事充總兵官良玉益感奮先後攻克紅崖墩觀音寺青山墩諸大巢蜀中卒底定復以援貴州功數資金帛三年六月良玉上言臣提兵裹糧累奏紅崖墩諸捷乃行間諸將未睹賊面攘臂誇張及乎對壘聞風先遁敗於賊者惟恐人之勝怯於賊者惟恐人之強如總兵李維新渡河一戰敗衄歸營反閉門拒臣不容一見以大尺驅鬚眉男子忌一巾幘婦人靜夜思之亦當愧死帝優詔報之崇禎三年永平四城失守良玉奉詔勤王出家財濟餉莊烈帝優詔褒美召見平臺賜良玉綵帛羊酒賦四詩旌其功會四城已復乃命良玉歸專辦蜀賊七年二月賊陷夔州圍太平良玉至乃走十三年扼羅汝才於巫山汝才犯夔州良玉師至

乃去已邀之馬家寨斬首六百追敗之留馬壘斬其魁東山虎復合他將大敗之譚家坪北平又破之仙寺嶺良玉奪汝才大纛擒其渠副塌天賊勢漸衰當是時督師楊嗣昌盡驅賊入川川撫邵捷春提弱卒二萬守重慶所倚惟良玉綿州知州陸遜之罷官歸捷春使按營壘見良玉軍整心異之良玉爲置酒語遜之曰邵公不知兵吾一婦人受國恩誼應死獨恨與邵公同死耳遜之咨以故良玉曰邵公移我自近去所駐重慶僅三四十里而遣張令守黃泥窪殊失地利賊據歸巫萬山顛俯瞰吾營鐵騎建瓴下張令必破令破及我我敗尙能救重慶急乎且督師以蜀爲壑無愚智知之邵公不以此時爭山奪險令賊毋敢卽我而坐以設防此敗道也遜之深然之已而捷春移營大昌監軍萬元吉亦進屯巫山與相應援其年十月張獻忠破官軍於觀音巖三黃嶺遂從上馬渡過軍良玉偕張令急扼之竹筍坪力戰挫賊會令爲賊所殪良玉趨救不克轉鬪復敗所部三萬人略盡乃單騎見捷春請曰事急矣盡發吾溪峒卒可得二萬我自廩其半半餽之官猶足辦賊捷春見嗣昌與己左而倉無見糧謝其計不用良玉乃歎息歸張獻忠盡陷楚地將復入蜀良玉圖全蜀形勢上之巡撫陳士奇請益兵守十三隘士奇不能用復上之巡按劉之勃之勃許之而無兵可發十七年